

堅

瓠

集

堅瓠廣集卷之五目錄

朋友不通財

易色

大歸

青雲

蒲盧

束修

雞口牛後

碧堊

萬石

飲器

乘槎

青泥印

魚腹中玉

游月宮

神畫

李博上

玉環

破大荒

人血愈鶴傷

梨酒

引光奴

盤捧小人

豬金

淮脫

傳鼓

手熟

調水符

天涯地角

豬羊蕩

石牛石羊

石化物

林方伯妾

王復齋子

墮崖女

丐兒還金

司帑有識

神針

妬報

定數

廬山

還銀得子

思屯乾道人

明初異擢

元功不利

錐土嗅物

劉忠宣鎮定

娶坐女

宗子相女

間封翁

煞神

食杏仁

平壇神

鍾馗

控馬奴

產異

人物同胞

男人生子

土龍

黃河清

柳蠻英

翻燒餅

堅瓠廣集卷之五

長洲石農褚人獲學稼纂輯

朋友不通財

子菴雜錄或慨朋友通財之難以爲聖門諸賢惟顏淵原思爲最貧子貢結駟連騎子華乘肥衣輕可云富矣當時不聞分給二子使不至困乏可見通財之義賢者猶難之愚謂顏子屢空不改其樂原思則夫

子與栗猶且辭却二子豈望人周急者人之相知貴相知心彼不輕與二子通財正深知其心者也不然賢如子貢子華寧亦如世俗人之吝於財者也

易色

賢智易色註云易其好色之心是矣然與下文竭力致身語意不類蓋易者改也遇賢人必改容以敬之色指禮貌言如其次

避色亦指禮貌衰也色乃身信皆曰己身
上事諸意一串此論殊佳出徐氏經牕

大歸

翰山日記古人以去婦爲大歸夫人姜氏
歸于齊大歸也王景興與鍾元常書近聞
室人孫氏歸曰大歸也其經憂樂旣久矣
曷爲一旦離析以至於歸而不反乎據此
則世俗歸寧輒曰大歸豈我思肥泉之義

哉言出不祥所宜亟正

青雲

京房易占百雲所覆其下有賢人隱續逸
民傳嵇康蚤有青雲之志梁袁宏贈隱士
庾易詩曰白日清明青雲遶亮阮藉游杭
身青雲中細羅孰能施李太白詩所有青
雲人高歌在巖戶皆言隱者高潔之意後
世乃移以詠入仕登名之士似誤

蒲盧

詩疏廣要等書皆以蒲盧爲果蠃似蜂而細腰俗呼爲蠅蛉又夏小正十月兮箴入於淮爲蜃蜃者蒲盧也唐敬括蒲盧賦云負么昧之異族能教誨而知變韓致光詩案頭筠管長蒲盧皆以爲蟲引中庸之蒲盧爲變化以証敏政朱子獨引沈括以爲蒲葦愚謂若從愚之說與敏樹語不合矣

束修

束修二字自朱子以束脯言人知爲弟子
餽師之禮不知漢書鄧后紀云故能束修
不觸羅網註以約束修整言之又鄭均束
修安貧恭儉節整馮衍傳圭潔其行束修
其心又劉般束修至行杜詩薦伏湛云自
行束修訖無毀玷延篤云吾自束修以來
爲臣子忠孝交不誦讀鹽鐵論桑弘羊曰

臣結髮束修得宿衛梁商曰王公束作屬
節晉荀爽掾賈堅堅曰吾束修自立君何
謂降耶嵇中散集云全束修無玷之稱皆
檢束修飾之義可見自行束修以上夫子
言能飾躬者皆可教也未必言及禮物朱
子以禮物言者本檀弓曰古之大夫束脩
之問不出境少儀曰其以乘壺酒束脩一
犬賜人若獻人則陳酒執脩以將命亦曰

乘壺酒束修一犬穀梁傳曰束脩之間不行境中故云束脩至博者

雞口牛後

蘇秦說韓宣惠王曰寧爲雞口毋爲牛後註云雞口雖小所以進食牛後雖大所以出也舊本戰國策作雞尸牛從安延篤有義云尸雞中之主從牛之子願之推沈在中皆取其說未知孰是

碧瑩

偃師其弘事周靈王竭忠盡諫爲王所戮
國人哀之爲藏其血三年而化成碧瑩於
邑中所葬之地數里皆成碧色故蜀中有
青泥坊見小窻別紀長弘之血化爲碧人
所知也而所葬之地數里皆碧或未盡知
故特表之。耳談新都段司徒家掘地得
古塚塚碑長五寸許皆有字云歛東蕭司

馬碧瑤不知碧瑤之義以問汪伯玉伯玉
云凡死忌而不得屍者得血以瑤曰碧瑤
本弘血化碧之義

萬石

漢宣帝時馮揚爲弘農大守有八子皆爲
二千石號萬石君茂陵秦襲與羣從五人
同時爲二千石亦號萬石秦氏唐武城張
文瑾四子皆至三品號萬石張家朱順昌

廖剛四子遲過遂寢皆秉麾節號萬石廩
氏今人但知石奮及四子連甲乙廖皆二
千石時人尊寵號奮爲萬石君

飲器

史記趙襄子殺智伯漆其頭以爲飲器讀
者謂頭骨不可爲器以飲故許者多謂洩
便器如虎子之屬惟劉氏註云酒罍集覽
正誤以爲非按呂氏春秋襄子與魏桓韓

康期而擊智伯斷其頭以爲觴謂之觴非
酒器而何又漢書匈奴傳單于以老上單
于所破月支王頭爲飲器者共歃血盟若
洩便器則不可盛血飲矣○晉書姚方成
漆徐嵩頭爲便器漢曰虎子西京雜記以
玉爲虎子又漢廣鑄銅爲虎形爲洩器又
唐人文集溺器曰夜豬蜀孟昶有寶裝溺
器○道書溺曰房中弱水

乘槎

乘槎事古來詩人皆以爲張騫杜少陵亦有乘槎消息近無處問張騫之句按騫本傳止云漢使窮河源而已未嘗言乘槎也張華博物志云舊說天河與海通有人賁糧乘槎而去十餘月至一處有織女及丈夫飲牛於渚因問此是何處答曰君還至蜀問嚴君平則知之還問君平曰某年月

日有客星犯牽牛宿然亦未嘗指爲張騫也及梁宗慄作荆楚歲時記乃言武帝使張騫使大夏尋河源乘槎見所謂織女牽牛不知慄何所據而云又王子年拾遺記云堯時有巨槎浮於西海槎上有光若星月夜朗晝滅十二年周天而更始名貫月槎掛星槎羽仙棲息其上則自堯時已有此槎矣

青泥印

拾遺記禹導川夷岳而令龜負青泥於後
令驅者河精之使者也龜領下有印文皆
古篆字作九州山川之字禹所穿鑿處以
青泥封記其所使令龜印其上蓋青泥與
漢武蘭金紫泥同類耳梁簡文與蕭隔吏
書必遲青泥之封後人直以青泥爲墨矣

魚腹中玉

挑燈集異太倉有漁人網得一大魚腹有
白玉長寸許上有篆文曰江山神換四字
漁人不識以爲石也持之換酒酒主亦不
納漁人持歸道經傳軍士之門傳老見之
以粟一斗易之見其瑩潔珍藏於家後傳
之孫曰東澹者登鞋士授兵部主事此玉
偶爲本兵公所見意甚欲之傳不得已獻
焉惜不知此爲何物也

游月宮

唐明皇游月宮事所出數處記載不一異
聞錄云開元中明皇與申天師洪都客夜
游月中見所謂廣寒清虛之府下視王城
差幾若萬頃琉璃田翠色冷光相射炫目
素娥十餘舞於廣庭三樂清麗遂歸製霓
裳羽衣之曲唐逸史則以爲羅公遠而有
攬杖成橋之事集異記則以爲葉法善而

有潞州城奏王苗投金錢之事幽怪錄則
以爲潞廣陵要之皆荒唐之說不足問也

神畫

潤州興國寺苦鳩鴿棲梁上穢汚佛像張
僧繇乃於東壁畫一鷹西壁畫一鵠皆側
首向簷外鳩鴿不敢復入羅隱寓晉江王
髻峯爲土人所侮隱畫一馬於石每夜馬
出食人禾追之則馬復入石人因禮而謝

之隱乃畫榜擊馬夜方不出天都載述昌
廣仁院佛殿邑人毛會繪一落畫一掃乳
兒於壁夜遂有兒啼聲衆怪之一日會至
院僧語及之會笑曰若欲止啼甚易乃以
筆添乳入口自後啼聲遂絕會名嘯起

李博士

耳談黃岡學博壽州李某自言居家時爲
鬼攝去因問鬼許大世界豈無有人逸脫

者倘肯爲我謀願饒焚錢以報鬼曰可姑
爲謀之掌判者許諾於是死去復生廣爲
焚錢後鬼歲必一至索錢轉限久來黃色
意謂得脫與諸生候大吏於河漕忽墮馬
界歸言前鬼復至擺我去幸倘許我轉限
卽設酒餞對鬼拱揖而饒焚楮錢果愈自
是又數歲鬼必歲至如在家時一日鬼至
云今後焚錢亦無益矣辭任歸家遂卒

玉環

楊太真小字玉環故古今詩人多以阿環稱之李義山詩云十八年來墮世間瑤池歸夢碧桃開如何漢殿穿針夜又向窓前
顧阿環可証平虛子仙志載大真生而有玉環在左臂環上有八分太真二字而鶴林王隱載唐狄昌詩馬嵬烟柳正依依又見鑾輿幸蜀歸地下阿蠻應有語這回休

更怨楊妃阿蠻又似楊妃小字昌亦唐人
必有所據而云然。癸辛雜識王荆公詩
云瑤池森漫阿環家又云且當呼阿環乘
興美瑤池是以西王母爲何環也按西王
母降漢庭遣使女與上元夫人荅云阿環
再拜上問起居則上元夫人亦名阿環耳

破天荒

破天荒之語蓋自宋時已有之似爲郡縣

初發科者而言荆南歲解舉人多不成名
至劉蛻始及第號爲破天荒開禧初南溪
登第者由史子申始人謂之破天荒又播
州冉從周舉進士時亦呼爲破天荒

人血愈鶴傷

李衛公遊嵩山聞呻吟聲視之乃一病鶴
見李作人言曰我被樵者傷脾得人血則
愈但人血不易得鶴放眼睫毛曰持此照

之卽知矣李自照乃馬頭也至途中所遇
照之皆大羣驢馬之類惟一老翁是人李
以鶴故告翁針臂出血李受之往濡鶴傷
處鶴謝曰公當爲宰相後當鶴昇語畢乃
冲天而去又固州司馬裴沆於鄭州道左
見病鶴呻吟有老人曰得三世人血塗之
則能飛矣惟洛中萌盧生三世人也裴訪
生授針針臂得血塗之而鶴飛去

梨酒

癸辛雜識李仲賓家有梨園樹之大者每
株收梨二車一歲盛生數倍常年無人求
售甚至用以飼豬有所謂山梨者味極佳
意頗惜之用大甕儲數百枚以年益而泥
其口意欲久藏取食既而忘之及半歲後
因至園中忽聞酒氣疑守舍者醱熟索之
無有因啓觀所藏梨則化爲水清冷可愛

酒然甘美真佳醞也飲之輒醉回回國葡萄酒止用葡萄釀之初不雜以他物始知梨可釀酒也

引光奴

輟耕錄杭人削松木爲小片其薄如紙針硫黃塗其銳名曰發燭又曰燂兒今聲僞爲穴寸蓋以發火及代燈燭用也史載周建德六年齊后妃省者以發燭爲業豈自

杭人之所製歟陶穀清異錄云夜有急苦
於作燈之緩批杉條染硫黃遇火卽發燄
呼爲引光奴今遂有貨者其名頗新

盤捧小人

耳談嘉靖乙卯何仁仲赴試鄂城見一丐
者以茶盤捧一小人云自江干拾得長尺
餘如猴狀面上五官畢具鬚髮半白手足
衣裙與人無二朝夕飲水食米與飯惟聲

似鳥雀未之能辨豈小人國之遺耶

猪金

萬曆初潯野闕王序三家豢一猪已二載
一日倚其主衣行異之隋其所往以紫掀
土出珎金千兩取之家遂饒自是德猪飼
以香飯澡以淨泉衣棉藉檀十年大可比
牛遠近來觀後死棺殮祭奠一如人禮近
開塘墅李其亦獲猪園中金家亦大富

渾脫

朱乘器漫紀舞有渾脫舞初不解所謂考
之前紀唐長孫無忌以烏羊毛爲渾脫氍
毹人效之號趙公渾脫亦不解所名萬曆
癸未四月以役三關行次太子灘隔岸群
虜來見亂流而渡有騎一物浮於水面曰
渾脫也蓋取羊皮去其骨肉縫製令不透
水以氣管吹之宛然羊也虜人乘以渡水

不憂汎溺蓋渾脫其骨肉而製就故以爲名長孫渾脫烏牟之毛以爲帽故名亦云

傳鼓

蘇俗有喪事弔客至則傳鼓爲信按吳隱之二年丁父憂事母孝故執喪哀毀太過家貧之人鳴鼓每至弔客哭臨之時恒有雙鶴警叫祥練之夕有衆雁羣集人以爲孝感所致乃知傳鼓晉已乘卽有之

手熟

金坡遺事載陳康肅公善射嘗射於家園
有一賣油翁釋擔而睨之發矢十中八九
謂之曰吾射不亦善乎翁曰無他但手熟
耳康肅忿然曰何以知之翁曰以我酌油
知之乃取一葫蘆置於地以錢覆其口徐
徐以杓酌油漉漉自錢孔入而錢不濕因
曰我亦無他誰手熟耳

調水符

蘇長公愛王女洞水洞在盤屋縣西南洞門崇四尺濶三尺旁有飛泉味甚甘冽飲之能愈疾長公至其處愛此水日致兩甕欲後取恐爲使者見給刀破竹爲契令寺僧藏其一以爲信數調水符如取水往來更換執之以爲驗耳沈石田詩未傳盧氏煎茶法先得蘇公調水符謂此

天涯海角

蜀中詩話賓王疇昔篇曰地角天涯渺難測成都有此二石也閩志圖天涯石在中興寺耆老傳云人坐其上則脚腫不能行至今人不敢踐履又有天涯石廟在大東門對昭覺寺石高六七尺今石入湯家園朱秉器漫紀石在蜀城東隅高二丈許厚僅半尺瘞根土中曳之若搖動可引撼之

則根不可窮地角石廟在羅城內西北角高三尺餘王均之亂爲守城者所壞今不復存矣。彭稚翁言廣東瓊州海邊有一白石大牌坊上書天涯海角四字

豬羊蕩

挑燈集異寧國府城外地名豬羊蕩野中有黑白二石各數畝餘黑者爲黑白者爲白各聚一處絕不間亂土人云昔傳有一

人驅羊豕各一羣行至北地道旁一人見之疑而問曰爾莫不是神佛化身何故徒行管攝許多豬羊其人聞言忽不見豬羊悉化爲石矣至今石尙存色不改

石牛石羊

湧幢小品昔有神人驅石之海祝曰蒼蒼爲牛鑿鑿爲羊牛羊來斯共驟同驟石皆奔逸見老姥曰見吾羊否見吾牛否姥曰

惟見奔石半半不見神曰惜爲道破悉化爲石

石化物

錄異記進士李眺於江干偶拾得一小石青黑平正溫滑可玩撫摩楷拭用爲書鎮偶有蠅集其上驅之不去頃視之已化爲石因求他蟲試之隨亦化焉穀落堅重與石無異

林方伯妾

八閩志莆田林氏有方伯公秀五旬無子
娶十四妾皆以妻妬死後致仕諸同年慮
其乏嗣醵金八十爲購妾里人避妬莫有
許者適督郵有女逾二旬罷官貧甚母利
金欲與而父難之女曰兩親無歸女安得
惜身但當善事之耳遂成婚不三日捷幾
死明日又捷女曰受捷惟此一次明日不

能受矣妻大怒明日又撻女歸房妻亦逐
入女忽閉門加刃於妻頂曰吾爲十四命
報冤殺汝反撻之無算妻急呼方伯救
解且矢天日再不撻女始解田是兩相歉
女生七子三甲榜四孝廉簪笏盼嚮不絕

王復齋子

耳談王侍御家齋有妾困於妬妻王出按
時妻幽閉妾樓上餓且死妻之子毓俊甫

八齡給母曰餓死人人謂不賢不如且食以粥湯一盂令其徐徐自斃可緩謗也母從之俊陰以小布袋藏麪食魚肉乘進粥時食之得不死逾年生一子侍御潛育之他所及侍御卒俊撫愛特至得以成立

墮崖女

拙菴雜組嘉靖中有宦而川遊者過險道女自輿墮崖下崖逼溪流深黯莫測以爲

必死痛哭而去後任滿還過其地將爲招
魂之奠土人謂年來見一仙女飛憩亭上
旋復飛去宦遊者曰有是哉停驂俟之果
見飛至視之乃其女也父母齊出抱女女
亦以父母故止曰兒在此甚樂不願歸也
強之歸問何以得生曰墮時卽止崖石上
饑則食樹子久而身輕能飛兒亦不自省
自火食後身不能輕還其故未矣

丐兒還金

白醉璵言袁忠徹致政歸四明某大叅來
賀以年孝令一童掖扶以進兒約十二三
衣縑縷貌古怪立於隅坐定袁視久之叅
政曰尚寶之注目殆入相乎袁曰以余觀
此兒他日之貴顯當軒輊於公叅政曰公
誤矣此兒素無賴貴從何至袁曰但取其
相他非所論後兒在叅政家大肆不良迺

出丐食於嶽廟一日有婦人挈包而進禱
嶽神前禮拜甚久忘包而出兒取視皆黃
白也兒藏包以俟見婦人悲號求覓兒卽
還之婦人以銀一錠酬之兒曰母誤矣欲
得之不繫所有平婦曰兒何所依兒曰無
依故丐耳婦卽攜之之北京爲夫所屈夫
蓋曰明指揮使也以冤滯獄得財始釋指
揮無嗣亦乏交庶竟以此兒承襲祖蔭

司帑有識

子菴雜錄楊和王沂中閒居時携杖微行
郊外遇一相字者王以所携仗大書地作
一畫相者起拜曰上上加一畫王字也閣
下其膺王爵者乎何微行至此宜自重
王笑索紙筆手批賞錢一百千令於明日
詣府向司帑者支取明日相者持帖往司
帑佯不認叱曰汝何人敢以贗帖來脫錢

相者具言其故且大聲稱屈於是司謂者
與同輩釀錢五千與之相者泣詈而去王
聞之召司帑問曰此直吾所批汝豈不識
耶司帑頓首曰固識之但彼藝術者流一
言偶中卽獲厚賞倘向人誇詡更添胡說
則吾王將滋謗矣且吾王已居王爵何所
復用相爲王大悅撫其背曰爾言是也卽
以賞相者錢賞之此司帑姓名惜不傳

神針

西齋語記隴州道士曹若虛精於醫尤精於針砭之術里有寡婦再遭人遇疾且死經日而心胸尙溫家人亟延若虛視之若虛曰是可生也引鍼刺之卽時而甦良久乃能語云初遇故夫相携出城外遠歷郊野復入林莽中轉展不相捨旣而故夫忽若爲一物刺中其足不能舉步由是獨行

遂如夢覺耳若虛歎曰吾達所針乃黃帝
鍼入邪穴也

妬報

乘異錄劉道芳爲蘧溪令秩滿歸京夜宿
縣界富民秦氏家恍惚見一紅衣婦人泣
告曰妾乃秦家子婦因妬鞭死夫所幸婢
卿訴於冥司追攝妾魂已償其命餘孽罰
作牝羊現在秦氏之園今將烹以烹客

爲一言生我明晨道芳語王人曰私忌不
食葷血勿宰羊主人云適已烹矣道芳陡
訝告以後來之夢秦氏舉家感傷遂堅之

定數

有老翁精數學一日有一道者來問數坐
其竹床床遽壞道者欲償其值老翁笑曰
成敗有數何償爲遂取床足示之有字一
行云此床某年月日有仙翁來坐床不能

載數宮壞因謂道者曰子必仙人也道者
愕然曰神仙亦莫逃乎數耶言訖不見

廬山

周武王時方輔先生與李老君跨白驢入
山煉丹得道仙去惟廬存故名廬山或云
周威烈王以安車迎匡續續仙去止存一
廬因名其山曰廬山又以先生之姓呼匡
山亦曰匡廬亦云匡阜

還銀得子

揮犀新譚京師數貧人貸銀十兩爲托賣
燒鶯之計道傍有傾銀店共假其錐鑿剖
之忽一塊爆起不見約計八錢覓之不得
衆大相咎至有欲畢命者明日又聞於樓
下上有監生訊之告以故曰我昨夜歸於
樓門檻得銀一塊當是汝物出銀還之果
是衆感其意分半酬之生固辭曰我欲銀

匿不言矣爾輩借貸所得吾安忍分眾益
感德思有以報他日得利頗厚見一人鬻
小兒於道索錢五百文眾議以三百錢得
之送監生爲僕同至旅次小兒一見便呼
爹爹大哭生亦哭乃在張家灣所失子也
年八歲登車時爲奸人抱去三月餘矣父
子感衆意又出銀以謝之乃知一事之善
遂使父子完聚造物報施之巧如此

思屯乾道人

耳譚金陵萬鎡適方外談長生爲人箕卜
請則呂仙必至一日箕語有客至其人業
卜可浴之故又善卜以是糊口隆慶庚午
鎡得風疾左臂不仁出必以杖忽逢一道
者亦名鎡鎡拄杖與語甚悉道者曰吾能
愈爾疾因令鎡疾行鎡曰不能道者畧引
以手便能行又以手捫左肉宿苦頓除鎡

大感悅拜問姓名住居曰汝向清元觀問
思屯乾道人便是磁歸遇友毛儔於門驚
問其故磁具道所以儔賀曰公遇仙矣思
者絲也糸屯純也乾者陽也乃是純陽呂
祖也至清元謁塑像正與所見合言呂祖
年若四十餘白哲長鬚青唐巾玉色道袍
袍有二綻處暗寓呂字手常拄而不放置
向腋前後亦是呂字意

明初異擢

洪武初徐興祖并杲俱以厨役授光祿卿
杜安道洪觀俱以櫛工官太常卿禮部左
侍郎齊春王興宗俱以皂隸官布政使他
如李孜省鄧常恩趙王芝凌中俱以方術
進顧玃由巫師俱官太常卿金忠以卜術
官至兵部尚書贈少師袁珙以相術官太
常寺丞贈少卿子忠徹官至尚寶少卿荆

祥荆義荆銅蔡信郭文英俱以木工官至
工部左右侍郎陸祥以石工官至工部左
侍郎許紳以醫官至太子太保禮部尙書
蔣宗武以醫官通政司通政使施欽仲蘭
奈宗周張鑾徐偉俱以醫得官禮部左侍
郎湯序右侍郎康永韶俱以天文生授

元功不利

明五元功皆不利高皇開國元功韓國公

李善長以嫌賜死成祖靖難元功洪國公
丘福并徑敗削爵全家謫海南景皇禦敵
元功兵部尚書于謙被譴棄市英廟復辟
元功忠國公石亨下獄論斬武功伯徐有
貞下獄流金齒世宗入繼大統元功大學
士楊廷和奪官

錐土嗅物

耳談成安九老家裕止一子禮度如長者

然有時持刃殺父衆聞於今令拘問之曰
民知法者安忍爲此特持刃時不自知耳
令大悟問亢老曰汝何業曰少業邸店曰
屋幾進曰四進時有業雖者雖土中而嗅
之卽知土中物因命遍錐其家得四屍蓋
業邸店時所殺取財而瘞之也亢老服罪
然見莫知父屍爲四家皆厚葬之而有其
財四之一焉曰多取非福也見亦賢矣

劉忠宣鎮定

天都載弘治王子浙江鄉試日大雨如注
號舍漂流諸生避雨擁擠公堂按察某令
逐之諸生鬩然擊以瓦礫監臨大懼欲易
日再試劉忠宣大夏曰非制且雨勢驟必
晚霽令武弁立案上傳呼諸生自度試文
可次第者留否則縱出諸生如忠宣言出
者雲湧監臨懼其盡出及雨止晚霽請燭

者尚有八百餘人衆皆大喜及揭榜得新建王文成守仁副都御史孫忠烈燧按察副使胡端敏世寧忠宣處事鎮定如此。耳談弘治王子泚闡試日空中有爲大聲者曰三人做得好事莫測其故後寧藩之變胡公發其謀孫公殉其節王公成其功始知空中之言爲寧藩發也

娶巫女

譚輅載浚縣祠唐后二山衆巫每歲取
民女爲公嫗有妨嫁娶前後守令莫敢禁
宋均命今後爲山娶者皆娶巫家女勿擾
良民其事遂絕較之西門豹投巫之事更
不惡而嚴從政者所當知

宗子相女

耳談興化宗子相生一女十餘歲巧慧
識子絕憐愛之以病卒囑曰勿去腕上金

獨從之後爲吏部郎春日郊遊憩一廢廟
見一女神塵泥積滿貌類其女拂其腕金
鐲在焉睇視是女物大怒聽泥取鐲并語
禮曹令以淫祠焚之自是痴夢其女索鐲
索居語甚憤激宗不爲動及入閤振文鐸
夢更頻宗以儼才二三日雌黃千卷文理
批評皆能口誦女至晝見常清亂之或加
塗抹宗無能爲計年三十六竟以悶死

聞太宰封翁

成化末寧波聞某商也始無子盡以腴產
給婿因家焉穉甥呼公聞應之甥曰呼我
公也聞不悅歲除步至庄家乃故役者也
方設俎焚香享其先甚虔已出餽薦聞聞
涕下沾襟曰甥情見於穉我身後疇享我
如汝者其若莫敖鬼乎媿見其甥遂留宿
不歸而庄客有女以祿命不利人故久不

字聞見之屬媒納爲媵時年六十四矣未
破臘而薨蘭次年生大宰淵八十五以子
貴受封又十年卒耳譚作梁大宰誤

煞神

耳談鄂城之俗於新喪避煞最嚴楚王孫
尚良素負氣矯厲不信嘗見喪煞回獨入
坐靈旁將几筵餘酒自取自酌至夜半見
群鬼如氤氲之氣繞堂而過叱之忽有雄

雞已如鶴鶴喙怒目飛立棺上尙良髮上
指其前擒之左手持雞右手把觴怒而責
曰汝是殺神乎何不畏我門外竊聽者聞
之皆爲股栗已釋雞出而金鐵之聲大作
至明毀无破櫬器物皆盡後尙良備享高
壽聞宋太祖微時人人家其家以避煞出
有雞在庭殺而烹之未薦而出其家歸釜
中乃是人頭信其神爲雞矣

食杏仁

孟蜀翰林學士辛寅遜居青城山一夕夢
神謂曰汝可食杏仁令汝聰明老而強壯
資於年壽辛拜請食法云以杏仁七粒納
口中久之則盡去其皮遂巡嚼爛和津液
如乳頓嚥日日如法食之一年必換血令
人強健康泰辛依方久服年踰八耋輕健
如童要之寡慾守直靜攝養生爲上

平壇神

耳談嘉靖末宜興染坊婦婦陳氏有容色
一木客見而悅之故以染屢過其家誘餌
百端無不可犯爲謀者密以數物夜擲其
家明日以盜聞於官又賄胥隸繫累窘辱
以冀其從婦益怒惟日夜禱於平壇神曰
我家敬事尊神最久獨不能爲我佑乎是
夜夢神語曰已命黑虎矣木客聞之猶罵

疑婦不旬日與六七客往山販木叢柯間
黑虎果出隔越數人銜之而去

鍾馗

高郵李毛保母爲五通所據屢治不能然
家漸裕一日欲得金首飾五通曰向見姑
蘇徐守家姬所戴首飾頗珍異往可得也
已跛蹇而返曰首飾已得過堂西小樓遇
黑臉醜惡鬚子擊我一鐵簡傷左股投於

井而適爲汝幾喪我命毛保聞之欲祭其所懼因假賣卜抵徐守家果以失首飾爲問疑其奴婢毛保布卦成曰物在井中徐命撈取果得詫以爲神婢奴德之尤甚延欵西小樓見所供鍾馗像正如五通所談給之曰惡神不宜以鎮宅我爲汝家移祀廟中其家許之卽携歸置堂中五通避不敢入遙屬耳於毛保母曰此神正向擊我

者我以汝故竊物得禍又向所遺物無笑
今反毒治我汝家禍不遠矣因去不復至
手批控馬奴

耳談臨邑察院署舊有怪過者不敢倖騾
薛文清公瑄督學山東竟酣焉夜半有黑
衣而立薛不爲意已而漸近手批其首且
視之得泥堊盥命隸跡之爲城隍廟控馬
奴因易其像崇遂絕身塑像仍露其頂

產異

婦人孿生已爲異事有一產而三至四五
六七者諸書所載傳錄於左天都戴采自
建康至天禧中產兩男一女者三石勒時
堂陽陳豬妻漢隱帝時內黃武生妻俱一
產二男天聖至治平一產二男者四十有
四從信錄永樂戊子靈丘李天秀妻米氏
仙里塵談嘉靖初京師米鑑妻香山蓮塘

鄭七仔妻廣州黃世綱妻俱一產三男續
已編汝寧縣秀才妻一產三男光州民婦
一胎三女光州知州陸人傑鍾見而異之
配爲夫婦萬曆中高平縣吳守倉妻井氏
松江有民妻俱一胎三子康熙癸丑黃州
衛生員李宏妻張氏乙丑五月諸暨張茂
妻李氏俱一產三男撫臣疏請部議給布
六疋米五石習文亭筆記成化間嘉善縣

鄒亮妻初乳生三子再乳生四子三乳生
六子漢永寧中南昌有婦人一產四子宋
建康中一胎四男者三一男三女者二石
勒時黎陽陳武妻一產三男一女北魏延
興三年秀容郡今太原忻州有婦人一產四男
四產十六男大同有婦人一產四男治平
中一胎四男者二萬曆戊申福州蘇九妻
鄧氏一產兩男兩女庚巳編正德中長洲

吳奇妻一產四男武進疾麻妻一產五男
陵韓野記天順中揚州有民婦一產五男
耳談萬曆庚寅南宿州有民婦一產七子
膚髮紅白黑青各異以爲妖屬一人瘞之
江許是夜里有長者夢神謂曰明日有七
將軍在阨過爾門爾抃之當獲福佑長者
起覘之果見有八携一筐以衣覆其上發
視之果七兒也錢勞之留育於家

人物同胞

人有與物同產者漢竇武母產武時并產
一蛇一鶴蛇鶴送之林中後母卒有太蛇
與鶴徑至喪所晉懷帝永嘉五年抱牢令
嚴根妓產一女一龍一鵝丹陽張慶始產
一男一虎一狸劉毅妻郭氏產一男一鼠
毅怒殺兒鼠走逸後郭病死方歛鼠來跳
入棺中劉聰劉后產一蛇一虎萬曆丁巳

廣寧一婦產一蛇一猴二角已爲異事群
談採餘崇寧元年六月西京民家豬生二
男一女一豬則尤異也

男人生子

庚巳編齊門臨殿寺一僧年少美姿容病
死其師建齋會家茶毘忽爆響腹開中有
一胞胞內一小兒長數寸面目眉髮俱具
眾所共見又嘉靖四年乙酉正月吳縣民

孔方腹痛穀道出血墜下一胞妻沈氏割
開有一男長一尺髮長二寸五官俱全隣
里驚報府縣申詳巡按朱貫昌具本奏聞
以爲人異乃知史載牡馬生駒未足異也
土龍

晉義熙中江陵趙姥以酤酒爲業居室內
地忽自隆起姥察爲異日以酒酹之有一
物出頭似驢而地無孔穴及姥死人聞土

下有聲如哭人掘地見一異物蠢蠢而動
不測大小須臾失之俗謂之土龍

黃河清

人知黃河清聖人出不知清後仍五色星
祥易乾鑿度云帝王將起河水先清清變
白白變赤赤變黑黑變黃各以三日皇明
通紀正德七年正月黃河清五日肅皇帝
發潛陟帝之符至九年又清

柳鸞英

湖海搜奇萊州閩瀾與柳某善有腹婚之
約及誕聞得男曰自珍柳得女曰鸞英遂
結夙契柳登進士仕至布政而瀾止歲貢
得教職以死家貧不能娶柳欲背盟鸞英
泣告其母曰身雖未往心已相諾他日之
事有死而已母白於父父佯應之鸞英度
父終渝此盟乃密懇隣媼往告自珍妾有

私蓄請以某日至後園待歸姻事可成遲
則爲他人先矣自珍聞之喜甚遂與其師
之子劉江劉海言之江海設酒賀珍醉聞
于學舍兄弟如期詣柳氏鸞英倚圃門以
望以物付之而小婢識非自珍曰此劉氏
子也鸞英詈曰狗奴何以詐取吾財速還
則已否則告官江海恐事洩遂殺鸞英及
婢而去自珍夜半醉醒悔失約急詣柳氏

黑夜直入園中踐血屍而躡嗅之腥氣懼
而歸衣履沾血達曙柳氏覺女被殺而不
知王名官爲遍詢隣媼遂首女約自珍至
堂尙任不容置辯論死會御史許公出
巡夢一無首女子泣曰妾柳鸞英身
賊劉江劉海所殺反坐吾夫幸公哀辨
獄妾死不朽因覺明旦召問自珍自珍
江海留飲事許公卽捕二兇訊之叩

與其服誅於市而釋自珍爲女建坊以表之自珍後登鄉薦人作釵釧傳奇

翻燒餅

今人以田產回贖轉售曰翻燒餅不知所起後見塵史載永熙旣下并州欲乘勝收復薊門咨於衆衆知政事趙昌言曰自此取幽州猶熱鏃翻餅耳呼延贊爭曰書生之言不足盡信此餅難翻後卒如贊言